

D'ajon
H
ARREST DE

LA COVR DE PARLEMENT,
Par lequel, le pretendu Mariage de
MONSIEVR avec la Princesse Mar-
guerite de Lorraine, est declaré non
valablement contracté : ET le Duc
Charles de Lorraine, vassal lige de la
Couronne, pour le rapt par luy com-
mis, condamné avec Nicolas-François
son Frere, & Henriette de Lorraine,
Princesse de Phalsebourg, sa Sœur.

312
1634
6140

En date du 5. Septembre 1634.



A PARIS,

Par A. ESTIENE, P. METTAYER & C. PRE-
VOST, Imprimeurs ordinaires du Roy.

M. DC. XXXIV.

Avec Privilege de sa Maesté.

14, 212 pp
coll. 27
Z



*EXTRAICT DES REGISTRES
de Parlement.*



EV PAR la Cour les
Grand' Chambre, Tour-
nelle & de l'Edict assem-
blées, le procez criminel
fait de l'ordonnance d'i-
celle par defauts & con-

rumaces, par deux des Conseillers à ce
commis à la requeste du Procureur Ge-
neral du Roy, contre Charles Duc de
Lorraine vassal lige de la Couronne,
Nicolas-François de Lorraine cy deuant
Cardinal & Euesque de Thoul, Hen-
riette de Lorraine Princesse de Phalse-
bourg, & Albin Thelier François de
nation, religieux profez de la maison
Saint Lazare lez la Ferté Milon, Pour
raison du rapt commis en la personne de
Monsieur le Duc d'Orleans, Fils de

France, Frere vnique du Roy. Informations faites par lesdits Conseillers à ce commis suiuant l'Arrest du 4. Ianuier dernier, le 31. dudit mois & an, & autres iours suiuaus. Declaration dudit Seigneur Roy, verifiée en la dite Cour le 18. dudit mois & an. Memoires contenans les demandes faites par le Roy audit Nicolas-François de Lorraine, cy deuât Cardinal & Euesque de Thoul : Avec la responce à iceux dudit Nicolas-François de Lorraine, signée de luy. Procez verbal de l'Huissier de Sainte Boeufue, contenant les assignations par luy données aux témoins ouïs en la dite Information, suiuant l'ordonnance desdits Conseillers. Lettres de Cachet du Roy adressantes à ladite Cour : Ensemble les Lettres Patêres dudit Seigneur Roy en forme de Declaration données à Videuille le 27. dudit mois de Ianuier, signées, LOVIS, & plus bas, par le Roy, BOVTHILLIER, & seellées du grand Seel de cire jaune. Avec la Declaration du Sieur Cardinal de Richelieu y attachée sous le contreseel, signée de luy, en date du 29. dudit mois. Co-

7
pie de la dispense donnée par le Sieur
Cardinal de Lorraine le trente-vnième
Ianuier mil six cens trente-deux. Certi-
ficat de Frere Iulien Vvarnier, Prieur
du Prieuré Nostre-Dame de S. Lazare
lez la Ferté Milon, du 14. dudit mois de
Ianuier mil six cens trente-quatre, con-
tenant n'auoir donné aucun pouuoir à
Dom Albin Thelier, d'administrer le
Saint Sacrement de Mariage à qui que
ce soit, pour n'en auoir luy-mesme la
permission. Arrest de ladite Cour du
24. Mars mil six cens trente-quatre, par
lequel elle auroit joint lesdites Lettres
de Declaration du 27. Ianuier mil six
cens trente-quatre, & autres pieces y
attachées ausdites Informations, Et y
faisant droit, ordonné que la Princesse
Marguerite seroit assignée, pour estre
ouïe sur aucuns faits resultans desdites
Informations, qui seroient extraicts, Et
que lesdits Charles Duc de Lorraine
vassal lige de la Couronne, Nicolas-
François de Lorraine, cy deuant Car-
dinal & Euesque de Thoul, & la Prin-
cesse de Phalsebourg, seroient adiour-
nez à cōparoïr en ladite Cour, pour estre

ouïs & interrogez; Et ledit le Thelier, religieux Benedictin, pris au corps, & amené prisonnier és prisons de la Conciergerie du Palais, pour estre aussi pareillemēt ouï & interrogé, & respondre aux conclusions que ledit Procureur General voudroit contre luy prendre, Et où il ne pourroit estre apprehendé, seroit adiourné à trois briefts iours à son de trompe & cry public, à comparoïr en icelle. Autre Arrest du troisiéme Auril audit an mil six cens trente quatre, donné sur requeste présentée à ladite Cour par ledit Procureur General, portant que les exploïcts qui seroient faits par les Huissiers d'icelle, pour l'exécution dudit Arrest, sçauoir à Peronne, pour la Princesse Marguerite, pour ledit Charles Duc de Lorraine, vassal lige de la Couronne, en son Hostel en cette Ville de Paris, Audit Nicolas-François de Lorraine, & à la Princesse de Phalsebourg, en la Ville de Chaumont, Et audit Albin Thelier, en la maison dudit Saint Lazare lez la Ferté-Milon, Seroient valables, & de tel effect, comme s'ils estoient faits en leur propre do-

micile, Ausquels seroient les Lieutenans Generaux & les Substituts dudit Procureur General du Roy esdits lieux de Peronne & Chaumont, tenus assister & estre presens à iceux exploicts d'assignations données ausdits Charles Duc de Lorraine, vassal lige de la Couronne, Nicolas-François de Lorraine, & Princesse de Phalsebourg, tant en la Ville de Chaumont, que sur le Pont de Neufchastel, par Thuret & Casault, Huissiers en ladite Cour, les quatrième & vingt-quatrième Avril audit an. Les deux defauts portant profit, obtenus en ladite Cour par ledit Procureur General du Roy, les 13. May & 2. Iuin audit an, contre ledit Charles Duc de Lorraine, vassal lige de la Couronne, Nicolas-François de Lorraine, & la Princesse de Phalsebourg, à faute de presentation & defaillans. La demande sur le profit desdits defauts, lesquels auroient esté declarez bien obtenus par Arrest du quatorzième Iuillet suivant, & pour le profit d'iceux, ordonné que ledit Charles Duc de Lorraine, vassal lige de la Couronne, ledit Nicolas-François

de Lorraine, & Princesse de Phalsebourg, seroient pris au corps & amenez prisonniers en la Conciergerie du Palais, si pris & apprehendez pouuoient estre en leurs personnes, sinon adiournez à trois briefts iours, à son de trompe & cry public, leurs biens saisis, & Commissaires y establis, iusques à ce qu'ils eussent obey. Exploicts des perquisitions desdits defaillans, & adiournemens à trois briefts iours. Saisie & annotation de leurs biens, faits suiuant lesdits Arrests, par Hegron, Langlois, Thuret & Casault, Huissiers de ladite Cour, tant en ladite Ville de Chaumont qu'en cette Ville de Paris, & autres lieux necessaires, les 24. 26. & 29. dudit mois de Iuillet. Defauts à trois briefts iours, obtenus en ladite Cour par ledit Procureur General du Roy, demandeur en execution desdits Arrests, contre lesdits Charles Duc de Lorraine, vassal lige de la Couronne, Nicolas-François de Lorraine, la Princesse de Phalsebourg, & Albin Thelier, defendeurs & adiournez suiuant ledit Arrest.

VEV aussi le défaut portant profit obtenu

nu par ledit Procureur General, contre la Princesse Marguerite, assignée en ladite Cour, suivant l'Arrest du vingt-quatrième Mars, & defaillante. Demande sur le profit desdits defauts. Autre Arrest du vingt-sixième Aoust suivant, par lequel iceux defauts ont esté bien & deuëment obtenus, & auant adiuuger le profit d'iceux, auroit esté ordonné, que les tesmoins ouïs esdites Informations du vingt-vnième Ianuier dernier, & autres iours suiuaus, seroient recolez sur leurs depositions par lesdits Conseillers à ce commis, pour ledit recolement valoir confrontation à l'égard desdits Charles Duc de Lorraine, vassal lige de la Couronne, Nicolas François de Lorraine, la Princesse de Phalsbourg & Albin Thelher. Et à l'égard de ladite Princesse Marguerite, ladite Cour auroit ioint ledit defaut au procès criminel intenté contre ledit Charles Duc de Lorraine, Nicolas-François & autres, pour en le iugeant y estre fait droit ainsi que de raison. Recolement fait pour valoir confrontation suivant ledit Arrest, par lesdits deux Conseillers à co

commis, les vingt-huit & 29. dudit mois
 d'Aoust. Reconnoissance faite par le-
 dit Frere Julien Vvarnier, Prieur de
 Saint Lazare, par deuant lesdits deux
 Conseillers, ledit iour 28. Aoust, du
 certificat par luy baillé le 14. Ianuier mil
 six cens trente-quatre. Traitez faits en-
 tre le Roy & le Duc Charles de Lor-
 raine, vassal lige de la Couronne. Ad-
 ueus d'Antoine & François de Lorrain-
 ne, donnez audit Seigneur Roy, par les-
 quels ils recognoissent que le Duché de
 Bar est tenu en hommage lige de la
 Couronne, avec plusieurs autres tiltres
 & pieces produites par ledit Procureur
 General. Conclusions dudit Procureur
 General du Roy. Tout consideré: DICT
 A ESTE', Que ladite Cour adiugeant
 le profit desdits defauts bien & deuë-
 ment obtenus, A déclaré & declare le
 pretendu Mariage de Monsieur le Duc
 d'Orleans, Fils de France & Frere vni-
 que du Roy, avec la Princesse Margue-
 rite de Lorraine, non valablement con-
 tracté. Et pour l'attentat & rapt com-
 mis par lesdits Charles Duc, Nicolas-
 François, & Henriette de Lorraine,

Princesse de Phalsebourg, ledit Charles Duc, vassal lige de la Couronne, est déclaré criminel de leze Majesté, felonnie & rebellion : Et pour reparation, le condamne dire & declarer au Roy son souuerain Seigneur, assisté des Princes, Ducs, Pairs & Officiers de la Couronne, en tel lieu qu'il luy plaira, Que par complot, trahison & conspiration, il a entrepris de faire contracter & celebrer ledit pretendu Mariage, non seulement contre la volonté du Roy son souuerain Seigneur, contre l'assurance qu'il luy auoit donnée, contre les sermens par luy prestez, de ne l'entreprendre iamais sans son consentement, & au prejudice de la fidelité deuë par vn vassal lige à son Seigneur souuerain : Mais aussi contre les Loix de la France, les Ordonnances des Roys, l'honneur de la Couronne & la seureté de l'Estat, dont il se repent, & luy en demande tres-humblement pardon : A laquelle declaration lesdits Nicolas-François & Henriette de Lorraine Princesse de Phalsebourg, seront tenus d'assister. Et outre a banny & bannit lesdits Charles, Nicolas-François,

& Henriette de Lorraine, a perpetuité du Royaume de France, & tous les biens feodaux qui leur appartiennent, tenus de la Couronne de France mediatement ou immediatement, les a declarez retourner, reünis & incorporez à icelle, & tous & vn chacuns leurs autres biens estaus en France, tant meubles qu'immeubles, acquis & confisquezz au Roy. Et afin que la memoire de la Iustice faite d'un tel attentat, rapt, felonnie & rebellion soit conseruée à la posterité, il sera construire & edifié vne Piramide en la principale place de la Ville de Bar, en laquelle sera mise vne lame de cuiure ou de marbre, qui contiendra le present Arrest, & les iustes causes d'iceluy. Et pour l'infraction des Traitez, manquement de parole & violement de foy en execution d'iceux par ledit Charles Duc de Lorraine, ledit Seigneur Roy est tres-humblemēt supplié, d'employer sa puissance & sa souueraine autorité, pour par la voye des armes se faire raison à soy-mesme, & se satisfaire sur les autres terres & biens non situez en France, ainsi qu'il iugera estre plus ad-

uantageux pour le bien de l'Estat, le repos de ses Sujets & la gloire de la Couronne. Et quant audit Albin Thelier, pour les cas resuultans dudit procez, l'a banny & bannit aussi à perpetuité dudit Royaume de France, Luy fait inhibitions & defenses y demeurer; & à toutes personnes, de quelque estat, qualité & condition qu'elles soient, de le retirer & receler, à peine d'estre declarez criminels de leze Majesté. Outre ordonne ladite Cour, qu'à la requeste dudit Procureur General du Roy, il sera plus amplement informé contre les fauteurs & adherans dudit crime de rapt, Et que le present Arrest sera publié par les Huissiers de la Cour, & affiché es carrefours & lieux ordinaires de cette Ville, & enuoyé aux Bailliages & Seneschauffées de ce ressort, pour y estre leu & publié en la maniere accoustumée. Et enjoint au Substitut du Procureur General du Roy sur les lieux, y tenir la main. FAICT EN Parlement le 5. Septembre mil six cens trente-quatre. Signé, VOYSIN.

Leu & publié à son de trompe & cry pu-

blic, par nous Mathurin Langlois Huiſſier
 en ladite Cour, aſſiſté de Maiſtres Claude
 Goizel, Nicolas Moreau, Daniel Hamonin
 & François de Sanlecque, auſſi Huiſſiers en
 ladite Cour, aux carrefours & places publi-
 ques de cette Ville de Paris, & de Mathurin
 Noiret, Iuré Trompette du Roy, & de deux
 autres Trompettes commis de Pierre Gil-
 bert & de Iantien le Chasble, auſſi Iurez
 Trompettes, le vnzième Septembre mil ſix
 cens trente-quatre.

12

EXTRAICT DE LA DECLARATION
du Roy, portant les Priuileges accordez
aux Imprimeurs de sa Majesté.

PAr Declaration de sadite Majesté du 22. Feburier 1620.
verifiée en Parlement le 7. Mars, Chambre des Comptes
le 8. Aoust, Cour des Aydes le 6. Octobre, Chastelet le 17. No-
uembre, & Bailliage du Palais le 27. de Septembre audit an.
Ensemble par plusieurs Arrests tant du Conseil d'Estat que du-
dit Parlement & Sentences dudit Chastelet contradictoirement
donnez en consequence de ladite Declaration, les 8. Ianuier
1626. vingtième May & 18. Aoust 1627. & autres, Et encor
par autre Arrest du Parlement & Commission sur iceluy, por-
tant permission de saisir, donnez en la presente année 1634.
Il est permis à ANTOINE ESTIENE & Pierre Mettayer,
Imprimeurs ordinaires de sadite Majesté, d'imprimer & ven-
dre seuls les Edicts, Ordonnances, Reglemens, Declarations
& Arrests tant du Conseil que des Cours Souueraines, Baux
generaux & particuliers, & autres expéditions concernans les
Finances, Aydes, Tailles & Gabelles, &c. Avec defences à tous
autres Imprimeurs, Libraires & autres, de les imprimer ou fai-
re imprimer, vendre & distribuer en quelque sorte ou maniere
que ce soit, sur peine de cinq cens liures d'amende. Voulant à
cét effet sadite Majesté, que ce qui se trouuera imprimé de ce que
dessus, par autres que le/dits Estiene & Mettayer, soit saizy &
cancellé comme nul & faux, & fait contre le commandement
& autorité de sadite Maiesié; ainsi qu'il est plus au long con-
tenu en ladite Declaration.

La presente Declaration a esté deuëment signi-
fiée à tous les Imprimeurs & Libraires, par Tem-
peste Sergent à verge au Chastelet de Paris, ledit
mois & an que dessus.

